



# Cunvegna da fusiun

denter

## las vischnauncas Laax, Sagogn e Schluein

### I. General

1. Las vischnauncas Laax, Sagogn e Schluein s'uneschan el senn dad art. 61 alinea 1 dalla lescha da vischnauncas dil cantun Grischun.
2. La nova vischnaunca senumna Laax e survegn in niev uoppen (annexa).
3. La vischnaunca Laax fa part dil circuit electoral politic da Glion e dalla Regiun Surselva.
4. Culla resalva ch'il Cussegl grond approbeschi ella, entra la fusiun en vigur igl 1. da schaner 2024.
5. Il messadi dalla votaziun sco era il rapport final dallas examinaziuns da fusiun ein ligiontas per las autoritads e valan sco basa strategica dalla futura politica communal.

### II. Effect giuridic dalla fusiun

1. La nova vischnaunca surpren las relaziuns giuridicas dallas vischnauncas oriundas, ella surpren lur facultad e lur obligaziuns inclusiv ils credits approvai.
2. La suprastanza communal secumpona d'in presidi e da quater commembers. Las empremas duas periodas d'uffeci han las vischnauncas oriundas il dretg dad esser representadas ella suprastanza.
3. Ina perioda d'uffeci dallas autoritads cuozza treis onns. Ei vegn fixau ina limitaziun dil temps d'uffeci da 12 onns.
4. La nova vischnaunca surpren tuttas plazzas da lavur. Ella ha l'incumbensa da trer a néz eventualas sinergias e da far las adattaziuns organisatoricas.
5. Gl'emprem pei da taglia communal vegn fixaus sin 40% dalla taglia cantunala semplia.
6. Il romontsch vegn fixaus sco lungatg official e da scola. Mesiras adattadas da mantener e rinforzar il lungatg oriund ein da fixar ella constituziun ed en ina lescha communal da lungatgs.

7. Il mument che la fusiun dallas treis vischnauncas entra en vigur retscheiva la Fundaziun Pro Laax ina contribuziun da 500'000 francs. Quella summa deriva dil agen capital consolidau. Cull'entrada en vigur dalla fusiun s'extendan intent e finanziaziun dalla fundaziun silla vischnaunca nova.
8. Ils models directivs davart il territori communal (MDTC) che las singulas vischnauncas han sviluppu ein d'applicar suenter la fusiun a moda ligionta per las autoritads. Oravontut il svilupp dalla planisaziun dil territori sto vegnir realisau enteifer la vischnaunca nova tenor ils principis e las finamiras dil MDTC. Per talas vischnauncas oriundas che han aunc buc implementau sin plaun communal il dretg surordinau federal e cantunal pretendiu davart la planisaziun dil territori (LPT I), vegnan las lavurs dalla planisaziun locala e dall'utilisaziun fatgas aschia sco sche la fusiun fuss aunc buca succedida.
9. La zona actuala da mistregn e commerci Isla a Schluein astga buca vegnir slargiada, gl'uorden actual d'utilisaziun per quei territori ei da surprender ella nova vischnaunca.
10. Ella nova vischnaunca vala pils menaschis purils dallas vischnauncas oriundas in privilegi d'utilisar las surfatschas agricolas communalas.

### **III. Reglaziuns transitoricas**

1. Ils mandats dallas autoritads che fineschan el decuors dil 2023 lur uffecis vegnan prolunghi tochen ils 31 da december 2023, aschia ch'ei dat quei onn neginas elecziuns parzialas.
2. Per las lavurs preparatoricas tochen il termin dalla fusiun fuorman mintgamai dus commembers dallas vischnauncas oriundas ina suprastonza transitorica. Las suprastonzas corrispudentas elegian quellas persunas a moda formala. Per regla duei il presidi ed il vicepresidi far part dil gremi. La suprastonza transitorica seconstituescha sesezza.
3. La suprastonza transitorica elaborescha la constituziun e la lescha da taglia. Avon che la fusiun entri en vigur voteschan votantas e votants dalla nova vischnaunca, a caschun d'ina radunonza communal constitutiva, davart la nova constituziun e la lescha da taglia.
4. Las empremas elecziuns succedan tenor la nova constituziun, e quei aunc avon che la fusiun entra en vigur.
5. La nova vischnaunca unifichescha schi spert sco pusseivel sia legislaziun. Igl ei la finamira d'elaborar e d'approbar ina legislaziun unificada aunc avon che la fusiun entra en vigur. Entochen lu applichescha la suprastonza pil territori dallas vischnauncas oriundas la legislaziun a moda transitorica tenor il dretg vertent.
6. Entochen che la fusiun entra en vigur astgan las vischnauncas oriundas buca decider novas obligaziuns resp. buca approbar expensas ch'ei buca urgentamein necessarias ni che eran buca enonuschentas il mument ch'igl ei vegn votau dil contract da fusiun, resp. buca

inclusas ella planisaziun da finanzas. En cass da dubis decida la suprastanza transitorica da dar liber l'obligaziun per mauns dils organs communal responsabels.

#### **IV. Procedura**

1. La votaziun dil contract da fusiun ei a Sagogn e Schluein a caschun dallas radunonzas communalas ed a Laax all'urna. Tuttas treis votaziuns ein il medem mument.
2. Il contract da fusiun ston tuttas treis vischnauncas approbar.

#### **V. Disposiziuns finalas**

Questa convegno da fusiun sto vegnir approbada dalla regenza dil cantun Grischun.

Approbau dallas radunonzas communalas da Sagogn e Schluein e dalla cuminonza all'urna da Laax ils 27 da schaner 2023.

Vischnaunca da Laax

Franz Gschwend  
president communal

Rest Giacun Coray  
menader finanzas

Vischnaunca da Sagogn

Thomas Candrian  
president communal

Claudio Cavelti  
scarvon

Vischnaunca da Schluein

Dr. Ralf Schlaepfer  
president communal

Marco Tschuor  
scarvon